

## ■ TRIBUNA POLITICA

# Pensain a las generaziuns futuras

DA SILVA SEMADENI,  
CUSSEGLIERA NAZIUNALA PS GR

**E**r a Paris, durant l'inscunter internaziunal davart il clima il december passà, han ins discurrì da quai: L'economia verda è l'economia dal futur. Dapi decennis savain nus oramai che las materias primaras – sco l'aua, il funs, l'aria netta, la biodiversitad, las ritgezzas mineralas e maritimas – èn preziasas, che lur disponibilitad n'è betg illimitada, ch'ins sto promover lur diever persistent e tegnair quint da l'entir ciclus vital dals products. Nus essan conscients che per savair cuntrarier las sfidas ambientalas creschentas e per mantegnair nossa qualitad da vita stuain nus utilizar il pli pussaivel resursas renovablas, evitar la sfarlattada, reciclar ils ruments, curt e bain: Nus stuain midar pass per pass las metodos da producir e da consumar enfin che l'economia tegna quint avunda da l'ambient. L'exploraziun senza prender resguard sin las resursas naturalas è, tranter auter, era la causa da las midadas dal clima, in svilup negativ e custaivel che mussa sias consequenzas pli e pli savens er en Svizra.

**I**cunvegn damai dad esser tranter ils emprims che ageschan, tant pli che cun midar gradualmain tar



l'economia verda s'avran novs martgads, novas technologies, s'augmentan l'effizienz productiva e la rentabilitad da las fatschentas e vegnan stgaffidas novas plazzas da lavur. L'importanza dal sector «cleantech» e sia capacitad da crescer è gia oz evidenta. E precis quai vul promover l'iniziativa populara «Per in'economia duraivla ed effizienta areguard la gestiun da las resursas» (economia verda) en Svizra. Las mesiras voluntaras da las interpresas na bastan betg e sche tut ils abitants dal mund vivessan sco nus en Svizra duvrass ins schizunt 2,8 terras per satisfar als basegns dad in e scadin. Ma nus possedain mo in planet.

**I**l 25 da settember 2016 stuain nus decider. Sche nus acceptain l'iniziativa per in'economia verda avain nus temp fin il 2050 per reducir noss'impronta ecologica da 2,8 terras ad ina. Questa finamira è am-

biziusa, dentant ina finamira a lunga vista, da realisar pass per pass e da maniera raschunaivla concordanta cun las finamiras internaziunalas per l'ambient ed il clima. Ils instruments ch'èn previs per la realisaziun n'èn betg novs ed insumma betg revoluziunaris. L'iniziativa prevesa mesiras per promover la perscrutaziun e l'innovaziun, plinavant prevesa ella prescripziuns per ils process da lavur, per ils products, per ils ruments ed era la pussaivladad da stgaffir stimul fiscal. Tut quai capita per che la responsabladad ecologica na giaja betg mo sin donn e cust dals consumers e da las generaziuns futuras.

**E**d ina davosa consideraziun: Il cussegl federal conferma che «en vista a las sfidas ecologicas urgentas è la pretensium da l'iniziativa da render pli lianta la durabilitad legitima». Noss parlament, sut l'influenza da circuls economics da stretg orizont, ha refusà schizunt il project modest elavurà dal departament Leuthard. Per cuntanscher la finamira dad ina economia verda en il proxim avegnir resta i dentant mo dad acceptar l'iniziativa. Er jau recumond quai, pertge sco che di il proverbial indian navajo: «Nus na ertain betg la terra da noss perdavants, nus la emprestain mo da noss uffants.»